



ՀԱՄԱԳՈՐԾԱԿՑՈՒԹՅԱՆ ՀՈՒՇԱԳԻՐ

Հայաստանի Հանրապետության արդարադատության նախարարության քրեակատարողական ծառայությունը՝ (**այսուհետ՝ Ծառայություն**) ի դեմս Ծառայության պետ Ծովինար Թադևոսյանի, մի կողմից, և Երևանի պետական համալսարանի սոցիոլոգիայի ֆակուլտետը (**այսուհետ՝ Ֆակուլտետ**)՝ ի դեմս Ֆակուլտետի դեկան Արթուր Մկրտիչյանի, մյուս կողմից (**այսուհետ՝ միասին հիշատակման դեպքում՝ Կողմեր**),

հաշվի առնելով Ծառայության՝ օրենքով նախատեսված հիմնական խնդիրները, դրանց իրականացման շրջանակում տեսական և գիտական հիմքերի ապահովման անհրաժեշտությունը,

կարևորելով Ֆակուլտետի գիտակրթական և գիտահետազոտական աշխատանքների մեծ ներուժը, ինչպես նաև՝ սոցիալական աշխատանքի ոլորտում գիտություն-պրակտիկա սերտ փոխգործակցությունն ապահովելու և անհրաժեշտ տեսական գիտելիքներ ունեցող պրակտիկ սոցիալական աշխատողներ պատրաստելու ուղղությամբ Ֆակուլտետի որդեգրած քաղաքականությունը,

նկատի առնելով վերասոցիալականացման քաղաքականության որպես հիմնական ուղենիշ հռչակումը և դրա համար սոցիալական աշխատանքի անկյունաքարային դերը, շարունակական համագործակցության մշակույթի զարգացումը,

արժևորելով Կողմերի համագործակցության ակնկալվող արդյունքները,

ընդունելով համագործակցության հարցում փոխադարձ շահագրգռվածության առկայությունը,

նպատակ ունենալով սահմանել համագործակցության ուղղությունները, ինչպես նաև կանոնակարգել դրա պայմանները և եղանակները,

Կողմերը կնքեցին համագործակցության սույն Հուշագիրը (այսուհետ՝ Հուշագիր)՝ հետևյալի մասին

Հոդված 1. Համագործակցության ուղղությունները և եղանակները

Կողմերը համաձայնում են համագործակցել հետևյալ ուղղություններով և եղանակներով.

1.1. Քրեակատարողական ոլորտում սոցիալական աշխատանքի պրակտիկայի զարգացման հարցերով առաջարկությունների ներկայացում, խորհրդատվությունների, համատեղ քննարկումների և այլ միջոցառումների իրականացում,

1.2. Ոլորտին վերաբերող և հետաքրքրություն ներկայացնող մասնագիտական գրականության ստացման մասին մյուս կողմին իրազեկում, հնարավորության դեպքում նաև՝ փոխանցում,

1.3. Ֆակուլտետի դասախոսների ներգրավում՝ Ծառայության աշխատակիցների վերապատրաստման շրջանակներում առանձին թեմաներով հանդես գալու դասախոսություններով, սեմինար-պարապմունքների իրականացում,

1.4. Ծառայության մասնագետների ներգրավում՝ Ֆակուլտետում դասավանդվող որոշ մասնագիտական առարկաների շրջանակներում՝ առանձին թեմաներով հանդես գալու դասախոսություններով,

1.5. Ֆակուլտետի դասախոսների ներգրավում՝ Ծառայության աշխատակիցների վերապատրաստման դասընթացների մշակման, դրանց համար անհրաժեշտ ուսումնասօժանդակ նյութերի պատրաստման շրջանակներում, Ծառայության համար դասավանդող կադրերի պատրաստում, վերապատրաստում, համատեղ կոնֆերանսների, հետազոտությունների և ծրագրերի իրականացում,

1.6. Քրեակատարողական ոլորտին վերաբերելի հարցերով գիտական հետազոտությունների թեմատիկայի համատեղ մշակում և իրականացում, մասնագիտական կարծիքների փոխանակում,

1.7. Ֆակուլտետի ավարտական կուրսի «ուսանողներին Ծառայության աշխատանքներին ծանոթացում, ուսանողների մասնագիտական պրակտիկայի կազմակերպում և ապահովում,

1.8. Ֆակուլտետի դասախոսական կազմի և ուսանողների ներգրավմամբ ազատությունից զրկված անձանց իրազեկվածության բարձրացման նպատակով մասնագիտական դասախոսությունների, քննարկումների իրականացում,

1.9. Սույն հոդվածով նախատեսված համագործակցության ուղղությունները սահմանող դրույթները չեն սահմանափակում Կողմերի համագործակցությունը փոխադարձ հետաքրքրություն ներկայացնող այլ բնագավառներում:

Հոդված 2. Ֆինանսական պարտավորություններ

2.1. Կողմերն ընդունում են, որ սույն Հուշագրի հիման վրա ծավալվող համագործակցության շրջանակներում ֆինանսական և այլ նյութական պարտավորություններ առաջանալու դեպքում, Կողմերը լրացուցիչ համաձայնագրերով հաստատում են նման պարտավորությունները համագործակցության որևէ ուղղությամբ իրականացվող համատեղ ծրագրի շրջանակներում:

Հոդված 3. Հուշագրի գործողության դադարեցումը կամ դրանում փոփոխությունների կատարումը

3.1. Հուշագրի գործողությունը կարող է դադարեցվել փոխադարձ համաձայնությամբ կամ Կողմերից մեկի ցանկությամբ՝ այդ մասին ոչ ուշ, քան 60 (վաթսուն) օր առաջ մյուս կողմին գրավոր ծանուցումով:

3.2. Հուշագրի գործողության դադարեցման դեպքում նախկինում Կողմերի կնքած և ֆինանսավորված լրացուցիչ համաձայնագրերը շարունակում են գործել մինչև դրանց գործողության ավարտը, եթե Կողմերը փոխադարձ համաձայնությամբ այլ որոշում չեն կայացնում:

3.3. Հուշագրում փոփոխությունները կատարվում են փոխադարձ գրավոր համաձայնությամբ: Փոփոխություններ պարունակող փաստաթղթերը կցվում են Հուշագրին և կազմում են դրա բաղկացուցիչ մասը:

3.4. Հուշագրով նախատեսված համագործակցության շրջանակներում Կողմերը կարող են համատեղ ծրագրերի իրականացման նպատակով կնքել լրացուցիչ համաձայնագրեր, որոնք չեն կարող հակասել Հուշագրին:

Հոդված 4. Կողմերի միջև տարաձայնությունների կարգավորումը

Սույն Հուշագրի դրույթների մեկնաբանության հետ կապված տարաձայնությունները ենթակա են կարգավորման Կողմերի միջև բանակցությունների միջոցով:

Հոդված 5. Եզրափակիչ դրույթներ

5.1. Հուշագիրը բացառիկ իրավունքներ չի վերապահում Կողմերից որևէ մեկին: Կողմերն ազատ են Հուշագրով նախատեսված համագործակցության առարկայի վերաբերյալ համաձայնագրեր և հուշագրեր կնքել այլ անձանց կամ մարմինների հետ: Կողմերը պարտավոր են պահպանել նաև կոնֆիդենցիալություն այն տեղեկատվության մասին, որը կարող է հանդիսանալ կողմերի աշխատանքային գործունեության կամ իրավաբանական գործընթացների գաղտնիք:

5.2. Հուշագիրն ուժի մեջ է մտնում ստորագրման պահից:

5.3. Հուշագիրը կազմված է երկու օրինակից, որոնք ունեն հավասար իրավաբանական ուժ: Յուրաքանչյուր կողմին տրվում է մեկական օրինակ:

5.4. Հուշագիրը ստորագրված է Երևան քաղաքում, 2025 թվականի մայիսի 14 -ին:

**Հայաստանի Հանրապետության
արդարադատության նախախարության
քրեակատարողական ծառայության պետ**



Ծովինար Թադևոսյան

**Երևանի պետական համալսարանի
սոցիոլոգիայի ֆակուլտետի դեկան**



Արթուր Ակրադյան